
... شعر ...

ابن مؤنث

تأليف

عماد زيدان

م ٢٠١٩

مؤسسة يسطرون للطباعة والنشر والتوزيع



رئيس مجلس الإدارة

عماد سالم

المدير العام

أحمد فؤاد الهادي

مدير الإنتاج

أحمد عبد الحليم

الطبعة: الأولى

الكتاب: ابن موت

المؤلف: عماد زيدان

تصنيف الكتاب: شعر

التصميم والإخراج: م/ محمد سالم

المقاس: ٢٠ × ١٤

رقم الإيداع: ٢٥١٣٧ / ٢٠١٨

التقييم الدولي: 7 - 820 - 776 - 977 - 978

العنوان: المكتبة والطبعة: ٣ ش صفوت - محطة المطبعة شارع الملك فيصل - الجيزة

التليفون: ٠١٢٢٩٣٠٠٠٢٩ - ٠١١٥٧٧٦٠٠٥٢

Email: yastoron@gmail.com

موقعنا على الفيس بوك: مؤسسة يسطرون لطباعة وتوزيع الكتب

جميع الحقوق محفوظة للمؤلف

إهداء

إلى أبي.. إلى أمي
إلى زهرات الأوركيد
(جيلان - سجدة - إيثار)
إلى أرواح الشهداء
إلى عاشقى الحياة
أهدى هذا الديوان

عماد زيدان

تقديم

هو شاعر أبن شاعر واصل إبداع أبيه بأبداعاته الشابه حاملاً أحلامه وآماله ليصل لقلوب الناس، غير أن عماد زيدان أثر أن يخرج عن جلباب أبيه فكتب نصوصه بالعامية المصرية الشاعرة الفصيحة فجاءت تشكلية جمالية لقيم الانتماء والحب والتمرّد الذي يصل إلى الثورة على الفساد. تحية للشاعر الموهوب عماد زيدان وأملاً مستمراً في تقدمه الفني وأن يكون في مستقبله محب للحياة.

د. يسرى العزب

٢٠١٨ / ١٢ / ١٢

أنا ابن موت

لأنني غضبان م السكوت
ولأنني عاشق للوطن
غزلتُ من شمسهِ كفن
صنعتُ من طينه تابوت
أنا ابن موت
مشهدي حبة عيال
والنعش رمش
البنّت أم شال
في دموعها المحبوسة بعينها
أنا منشال
جبانة يا عيون جدتي
بابك خيال...
أنا ابن موت
والدنيا صالباري
في جذع الحياة

شاداني وجالداني
مصر أُمي... تصرخ
وصوتها حَياني
والنيل بينفخ - غضب -
والنفخ أحياني
يا بلدنا موج الموت
جابني وودّاني
والعشق اللي قتلني
اهو جابني من تاني

فَتَشْتِ جَوَا ضَلُوعِي... عَنِ مَسْأَلَتِي..
إِنْسَانٌ بَرِيٌّ.. عَائِشٌ حَيَاةٌ مُعْضَلَةٌ
قَلْبِي يَمَامُهُ.. وَحَبِيبِي كَأَنَّ صِيَادًا..
أَوَّلُ مَا صَادَ.. وَقَعْنِي أَنَا فِي الْخَلَا!

تشجيع

تشجع لعلك
تنول المراد
إذا الخوف تملك
هتفضل محلك
تمسك يمسك
بهاء العناد
وانسى اللى قال لك
سلموا اللى خافوا
دا هم اللى شافوا
القضا بالميعاد
لا أبداً تلافوا
هجوم الجراد
لا أبداً تنافوا
ما كتب المداد
تعيش الشجاعة

ففى قلب الولاد
وقل «ماتخفوش»
لبنت النهاد
لواد فى المهاد
لحى وجماد
واذا زاد عدوك
فى عدة وعتاد
هتزرع شجاعتك
نخيل فى البلاد
تشجع لعلك
وقلبك يدلك
بان اللى عزك
وذل فعدوك
دا رب العباد

وتقول لي اكتب في الهوا اسمي
وارسم كمان وبالألوان جسمي
وامزج خيالي بخيالك سوا...
قلت لها حاضر.. بشرط.. تبتسمي

سجدت لربي فمدلتا بدون رياء
رفعت راسي بعدها وفي كبرياء
كوني إني أكون رافض لغيره أنحني
وأرفض عروض الأذل
واني يكون في مطمعي
أكون في عرف الناس غني دا مش غباء!

وأقول يارب

وأقول يارب حولني
لشربة ميه لابن سبيل
لموجة صغيرة في النيل
وأشيل مركب ضعيف الحيل
وأعين موجة معدية...
وحاملت رسالتك من جني لجنية...
وأفرح طفل بيتلعبط..
مع الأحلام في الميه
وأضحك طفلة بتعافر بحنية
وأقول يارب حولني...
لذكرى..
م اللي بتعدي على خاطر
فيتبسم ولد شاطر..
بيهدي حبيبته وردايه
في صبحيه....

وهي حببته وردايتة منديه
وأقول يارب حولتي ..
لضحكة طالعة من قلبي مدويه .
لأنى يارب مش عاوز
أشوف الحزن ..بعدي

يا اللي رفضت الورد

يا اللي رفضت الورد ..
قصدك تجرحني
أديك جرحت الورد...
ناسي اللي كان منك
وجاي لك أهه تفرحني ...
وياريت ماجاني الرد !

* * * * *

لا اللي زرع ورده
ولا اللي قاطفها .. ولا اللي لطفها
يهون عليه يشوفها يترفض شوكتها
ما بال بأوراقها ..
حزينة على فراقها ... جنايني ذوقها

* * * * *

يا اللي رفضت الورد
لا يهمني إنك رميت الورد
لكن حزنت كثير إني هديتك ورد!

تفاحتم آدم يا ابن آدم بايديك بتتاكل
وما بينا دايره الناس تفسد وتتقاتل
إمتى قابيل وهابيل ينتهوا بيننا؟
ونعيش حياتنا بدون ما نتشاكل!

من حزن الجنة خرج آدم وكان زعلان
أنعم عليه ربنا بحزن حوا اللي كله حنان
فلو كانت الأنثى مش جنتا... ولا حوا..
فإيه هتكون غير فنتة من الشيطان!!

حبيبتى

حبيبتى رموشها ما نعاني
أسلم ع العيون بالعين
رماح لجماح هوى قلبي
وأنا مسكين
وباسبح فى العيون م النيل
لنهر السين ...
ولسه عيونها متسعت.
وفيهـا يا قلبي راح تسعى
خطاوي العمر ليه واسعت؟
كدا يا سنين!
حبيبتى قلبها قال لي
بان الحب واصل لي
وقل يا حبيبي ما تخلي
ولو بالعين

في رثاء (ملاّب الأتوبيس المحترق)

أهل البحيرة في حيره
والحزن ضيف اليوم
افتح كتاب السيره
على صفحتة المكلم
يا نار عماها الغيره
أكلت ورد القوم

* * * * *

يا وجعك يا أميره
مات الحبيب مظلوم
كان جوا كتابه صوره
فيها حزنك المكتوم
وضحكه متزوقتا
لوشك المرسوم
فارقك وانت الأسيره

فى بلدنا أم النوم

* * * * *

صرخت ولاد صغيره

وصرخهم معلوم

يا اللي انت سايق بينا

علي فين مودينا.....

النار حوالينا... لكن الصراخ ...

معدوم

يارب سوق بينا

ولا غير حكمتك لينا... ارحمنا يا الله

الضحك فن

الضحك فن

والفرح مش بالسن

طلعها صدقها ..

خليها جهر

وللحبيبة..

ادفعها مهر

ارفعها دعوة..

وزود وزهر

طولها .. طول

إن شالله شهر

ارسمها مهرة

جريها نهر

ركبها جن

جننها واتجن

الضحكة فن

القصيدة

وأنا كل ما آجي أكتب قصيدة
فى العيون السوده
أوفى الرموش
اللى صادت قلبي صيدة
أوعن حدود...
ماليه قلبي بالعود
أوعن حبيبتة أميرة
حلوة بقوام ممدود
تاخذك يا مصر الغيرة
وتفكريني بكلامي وغرامي
إنك حبيبتى الوحيدة
فمهما تقول الجريدة
من أخبار...
مهما زاد حوالينا من أشرار
مافيش ما بيننا اختيار...

ملزوم بحبك صبيه
آمنت بيك نييتا
يا سيدة درويش
عرفت ما عرفتيش
بأني راهب فى حبك
لو صومعتا رهبان
تكون فى أي مكان
أكون على أرضك
بعقلي أو مجنون
بكرامتا أو ملعون
أصلي ماليش غيرك
يا عش ...
انا طيرك
أصل اللي بيني وبينك
مش مسألته حكام
ولا هاضحي بكام
ولا كلمتين وسلام
شوفتى جدي وهو قدي

شق القناه
وما قلش آه
وكان بيضحك ع العدو
ويقول عبيط
حب الوطن مش صييت
ولا ضربت الكرياج
هتسوق ولد
إيديه ذهب
وضوافره عاج
ما فيش فى زرعه اعوجاج
يبني الهرم معراج
يغزل لمصر التاج
ولو إنه مش حلاج
والا أبوي
يوم عبور الخط...
قام وعدى ونط
معاه رفاق لحد مد الشوف
وعدوا شط الخوف... بدون نفاق

وقف العدو مكتوف
كان العدو مذهول...
كان العدو سكران وفاق
دولا جنود نبلاء
بيرحبوا بالموت
كأنهم فى سباق
مين اللى يشرب كاس لذيد
دا الموت شهيد ألد من طعم النيذ
ولا شئ عزيز...
لو الوطن ينداس
كله يهون لأجل الوطن ينباس
يمكن فى كل الناس
حب الوطن موجود
لكن اللى شافه العدو
عشق ومالهوش حدود
يمكن فى كل الناس
حب الوطن عاده
لكن اللى شافه العدو عشق وزيادة

يمكن في كل الناس
قوة لحمل سلاح
لكن اللي شافه العدو خلى العدو مداح
يمكن في دم الناس
حب الوطن يجري
لكن اللي شافه العدو خلى العدو يجري
قمت عقيت يا مصر
قلت دا ولدي
كل الولاد تتمنى بلد كما بلدي
كل البلاد عاقر بيان تجيب ولدي
والايوم الثورة
يوم ما كشفوا بلدنا عورة
يوم ماسموها مؤامرة
مايعرفوش إن دا وقت المخاض
وبان مصر الجنة قمرة
وانها حلوة وسمرا
وان جوا جمالها جمره
وانها ست البلاد

من بعد يوم القيامة
من قبل يوم الميلاد
ولست ابني وابن ابني
واقفين طابور
مهما اختلفنا فى قول
الكل حافظ الدور
حبك يا مصر عظيم
وصعب ع التلجيم
وعاصي ع التعتيم
دا الرب موسى كلمه
على أرضك التكليم
فازاي وفلاحك فصيح
أحتاج أنا تصريح
عشان أقولك باحبك
فإياك الغيرة تاخذك
لو أغني فى عيون
أو أغازل... جفون
يبقى الغزل فيها
لكن الهوى ليك..

أنا لسه باتفلسف وهاتفلسف وباتعاجب !!
وكلامي خر...ومني ... ودا يعنى لو ... عاجب !!
ولو مش هاعجب..حد فى الدنيا... وإيه يعنى !!
أنا كدا .. بدون ما أتكبر.. ولا أرفع الحاجب !!!

غزل البنات

وعندي غزل البنات
وعندي حكايات تسالي
قابلوني يوم التلات
أنعم عليكو بوصالي
ليه يا بيضه ردك سكات
لو قلت عايزك حلالي
يا سمارة لك غمازات
واخده لها شكل هلاللي
يا طويلتة عايشه بحالات
مجنونتة... طبعك مثالي
والأوزعتة ساعة وساعات
أسمعها تقلب لي حالي
خفتة الدم وحاجات
ماجاتش أبداً ببالي
يا سمينتة إنت بالذات

أحب أشوفها قبالي
حلوة وحنونة وميزات
ندهت ع الحب جالي
وتليق عليها الموضات
تلك النحيفه الغزالي
وعودها يشبه نبات
طالع فى قلبي بتعالى
أحب أغازل البنات
وأسوق عليهم دلالي

التوبة

غرقان فى بحر المعاصي
ومين يطلعني
سواك إله الناس جنبى
..... وسامعني
فيه نفس بتشدني
ونفس بتلومني
والذنب له لذته
لكنه واجعني
إلهى سبحانك
مهما يكون ذنبي
رزقك ولو نايم
آلقاه ينام جنبى
والسيئات كلها
ساعة صفا وياك
تتمسح ما تعود

ولو يعود ذنبي
دخان ذنوبي يارب
خلاني مش شايف
سواد طريقي وضلمته
ماشي وانا خايف
نورك ومن رحمتك
مالك شريك فيه
ولمين بذنبي أعترف
سبحان العارف!!!

أنا الذي عمري ما انكسرت
ولا انهزمت ولا انتصرت...
قالوا لي كسر القلوب يعني موتك
سكتت دقات قلبي لما افكرت!

وفيه يقولك

وفيه يقول لك
باصلي وأصوم
وعامل لي فيها
إمام القوم...
فاهم لي دينه
مظهره وهدوم
ولا يعرف الشرع
ولا يعرف العلوم
تعاشره ساعه..
تعاشره يوم
عامله بفضيله..
يحدفك بالدوم
ويسب لك بالكوم...
ويخلي سماك غيوم
ظالم عظيم...

فى توب مظلوم
هيئت يمامه لکنه...
ياساتر... بووم
يموت فى النميمه
وبخ السموم
تشوفه يااه ع الخشوع
تمام مرسوم
ويغلب الشيطان فى الفساد ...
ولا يحس بلوم
اكذب ما تكذب...
الخيانه بتتكشف
ما فى لثيم وماكر
فى كذبتة بيدوم.

رمضان كريم

رمضان كريم.....

وهديه ليك

ضك وسكر.....

باب معاصيك

عيش في مُعسكر

شهر عليك

أيام سُكر.....

.شوف بعنيك

بدر ينور.....

على لياليك

اقرأ وفكر.....

.قرآن ربك

حلوة الخلوة.....

يا بركتاً صبرك

جالك عيد...

فى نهايتا دربك
هلل....سبح....حوقل
..كبر
سبحان الله.....
والحمد لله
والله أكبر.....
..الله أكبر..

أمرت قلبي..الأبيض الخالي
لا تحب...لا تكره...ولا تتعالى
كله لأجلك يا قلبي..خليك ع الحياد
ياما بكره يتغيروا..وانت اللي تبقي

من إيه

من إيه؟؟؟

من عبد قام اعتكف
الظلم خاف وارتجف
إزاي في يوم مولده؟
باعدوا عليه مسجده
والفجر ضاع مواعده
والعدل مين بيوجده
في قش ظلم الوطن

من كلمته جوا الراس
توصلنا بالإحساس
نقلها للكراس
لكن وللإخلاص
سن قلمنا رصاص
مكسور من الرجفه

مرعوش من الوقفه
إزاي يقول للناس
بأنه طاله العطن؟؟؟

دا من سنين الألم
رسمنا لون العلم
والجد لما اتظلم
بنالنا أكبر هرم
ف عز الاستنزاف
العز ما يينشاف
والشعب أكله خشاف
وغموسه لحم كتاف
عدو ملان بالفتن

من فتحه جوا الحلق
طالين عليها الخلق
وزي ساعة تطلق
الكل همه نزول

لقمته بلحسة فول
يمكن ملاحا العفن
لكن بفعل الكسل
يحلو قشر البصل
وكأنه تين اتختن

من موته متعلقه
فى طلقه أو مشنقه
خيتها كالشرنقه
منقوشه متزوقه
بألف حبل انقتل
مسقوط ياراس انقتل
مرفوع ياراس الوطن

صوت الشهيد

صوت الشهيد ..
يا أعلى من ضجة الميادين
فزت بنعيم الجنه ..
من غير نفاق في الدين
قدّمت روحك تمن
واحنا ورا الجدران!!
جدران إشاعه...
جدران سجون...
جدران إذاعه.....
وميكروفون..
جدران خلاعه
ورقاصين!!!
جدران صحافه
كذب وسخافه!!
وفي آخر الصف... في المظاهرة..
الكل واقف مرابط!!
ينتظر نياشين!!!

وتقولى لىه المحبه ...
والحب خلاك ورايح؟!؟!
قلتها شوفى المطر...
نازل وف بحر مالح!!

يا ظلم سيبني

يا ظلم سيبني وقول عوافي
سنين ناهبني ولا جبت نافي
أنا أصلي عافي
لا فف فيافي
وبقلب صافي
عارف بيات الشمس
جبال طلعت
حواديت سمعت
ورقاب قطعت
لا بسيفي... لكن لمس
لصاحبي أجافي
مادام ينافي
ويقول طمعت
باع بكره ليه بالأمس

هموم تجيني
والحزن خافي
أقول يا شافي
نجيني...ضعت
والدعوة خفيه وهمس
كل الأماكن
ساحتي ومكاني
راكب حصاني
عنتر زماني
وبسيفي طحت
وعبلت بلدي
أمي وتقربلي
ولا حد قبلي
سمعها طبلي
أنقر بسيفي
على رق قلبي
لما انقطعلي
وخر دمي

يا أمي لمي
جرحي وهمي
وبلاش تدمي
وتسدي يمي
مين سد عين الشمس

سبيني أنزف
وبقلمي أجدف
في بحر حبك
وهبني ربك
نيل م الأمانى
وبأيدي تانى
هيعود إليكي
فى الأرض مجدك
اعترفي بيا
قولي إنى ابنك
مش عبد عبس

إيدك فى إيدي
النيل دا كفك
والحب همس
حلفااان زتونك
ماعدش خبس
فكي لجامي
حوشي اللي جاعو
من التهامي
لمي قضاتك عن إتهامي
وأنا أحمي عبس!!

يا للغباء.....!!!
وإزاي تعيش الإنتماء...
مع حد رافضك فى الخصال؟
خلي الوصال..بينك وبين رب السماء!

ولا كان زعيم مملكه
ولا عاش حياة صعلكه
لكن نبى.. ومنهجه
فَرحنا بعد البكا!!

الـحـب

الـحـب عـمـرـه مـا كـان نـشـنـجـى
هـو كـدـا... عـايش مـزـانـجـى
خـلي العـفـيفـه تـعـشـق لـومـانـجـى
وـبـنـت طـب .. حـبـت تـمـرـجـى
واحتاس فى حبه أديب أدارجى
يـعـزـف كـمـانـجـه كـما الكـمـانـجـى
وـبـنـت شـقـرا حـبـيبـها زـنـجـى
لـغـوتـها Love... Love
وـكـلامـه شـنـجـى
ألا أيها الحب الظلوم
خـليـك فى وـنـجـك..
مـا تـجـيش فى وـنـجـى
أنا لست ماكر
أنا مش حلنجى...

العيش

يا حكومه ويا صحاب الطوايين

أنا عايز حقي عجين

إدوني إنشالله السحله

إدوني إنشالله طحين

بني آدم عايز أعيش

وأقل حقوقى العيش

العيش كوسه وبالعافيه

أوصل يقولولي مفيش

العيش بالسب وبالضرب

علشانه تقوم ميت حرب

وأنا أعزل مافي إيدي سلاح

والأسهل أفطرب

دي عيال حبيبتة فى سن الحب

عرقهم بحر وأنفاسهم بتهب

العضم يحك فى بعضه

أنا خايف ناره تشب
مش ناوي أكون كاتب معروف
ولا حتى سياسي ولا عايز أحكم
ولا عايزه خروف مكتوف
أنا عايزه رغييف ملفوف
متعاص بالخوف
أكله مع الفول الدامس
ألقاه كانس
كل اللي في مخي أنساه
أبقى زي المخطوف
بقى أكلي مخدر يا حكومه
وأمالي خلاص معدومه
ولا هسأل عن أي موازنه
وأهي تاهت مني المعلومه
وانتم يا أصحاب الطوايين
بيعوا حقي دقيق وعجين
وإزاي أنا أوصل صوتي
للي ودنه من طين؟!!

ومش لازم ياخذني الموت عشان تدعيلي بالرحمه....
ومش لازم نكون فى براح عشان نسلم من الزحمة....
ما تيجي نبدل الأدوار....ونقبل لبعضنا الأعذار...
ومش لازم نصنف بعض بين أبيض وبين أسود كما الفحمة!

يا أم الرموش

يا أم الرموش واحـة
يا أم العيون راحـة
للقلب اللي انكوى
حبيبتي يا أم الضفاير
يا أم الجمال فاير
حبيبتي يا طيبة..
قلبك روى وارتوى
تسلم ايديكي فى ايديا
تسلم ايديا فى ايديكي
ياريت نخليهم سوا

توت.....توت..توت
وان شاء الله الحزن يموت
والأحزان ها نسيبها تفوت
خزنا سمكه وفرحنا حوت
خلى الضحكة تقول لدموعنا..
أنا صاحبة عزة وجبروت..
وان أملك هددلك أملك
اضرب أملك بالنبوت!!

يا ظلم جوا بلادي
مترعرع...
العدل مايل ليه؟
ومتزعزع...
يا شعب قوم النوم بقا
وشعشع..
يا قاضي رد الحق..دا الحق..
متضعع
وخلي صوت الشهيد
يهتف لمصر..بقوة
يهتف لنا..
يلعلع!!

ملعون أبوه الأدب
لورحنا فى الرجلين
أديب قليل الأدب
إذا مس مصر الشين
فى قلبي عايش وطن
فى صلاتي حي الدين
فبلاش تصنفي
وتكتب على جيبني
وتقول عليا شيوعي
أو فكره علمانى
يا عم اسكت بقا
قطعت مصاريني
أنا مصري .. إيه يخلصك؟
فى ملتي وديني
أنا مصري .. ولعلمك
وطني .. ومن غيرك
عارف أمور ديني.

ورودتني الدنيا

ورودتني الدنيا عن نفسي

وغوتني ..

خلعتلي توبها ..

وفي حضنها

خدتني ..

رقصت ومالت ..

ومن خمر ..

عودها الجمر

صبت هواها ..

وسقتني

غنت وقالت ..

يا حلولا تقوتني ..

اعشق جمالي

يا جدع

أنا اللي مليانه ..

بدع
أقرا الكفوف ..
والودع
سحبتني من أيدي
ودتني وجابتني ..
نسيت وجودي
وليه اتخلقت!!
أستغفر الله
من دنيا حلوة
خدعتني!!

أنا شاعر

أنا شاعر لكن مغمور
مش لازم أكون مشهور
يمكن بكره الدنيا تدور
أمسك قلمي الأمور
أصرخ وأفرح وأهدا وأثور
وأكتب عن بكى وسرور
لحظات من عمري وشهور
وغرور واحد عاش مغرور
شاييف نفسه وكدا مبهور
وبقلمي ناوي أهد السور
وأبني القلب المكسور
أنا شمس لوطني ونور
أنا قلب لكل غيور
أنا شاعر لبنات حور
وبغازل حق وزور...

فى عيون نونو... زي العصفور
وبيا أروح الحلم وأزور...
بنوته .. بخيال بللور
وارجع تانى لنفس الدور
أنا شاعر... لكن مغمور

ست الحسن

ست الحسن
من بين خدود السما
بانت نجوم
بالليل ضلام إنما
ممنوع يدوم
لكن جمالك دام
العمر والأيام
شبابي راح قدام
يفرح ويرقصك
شاييل على كفي
غصنين زيتون وحمام
طاير معاه نصلك
رسمت سلام تكفي
للي نسي أصلك
عاشين أنا وابني

طول الزمن نبي
في أهرامات نسلك
يا مصر يا أم الحياه
عاليّة الزمان سابقاه
شجره وفيكي الغصن
ورق الجمال غطاه
يدوم جمال الله
سماه ياست الحسن

لا

لا تخط يا قلم خطي
ولا تداعب رمال شطي
ولا تحكي حواديتي
والخيال اللي من صيتي
ولا تنقش على حيطي
ولا ترسم جدار بيتي
ولا تكتب فى أشعاري
ولا تفتش فى أسراري
ولا تكتب على جيبني
ولا تكحل رموش عين
ولا تأمر وتنهيني
ولا تمجد لي سلطاني
ولا تلعب بأوطاني
ولا قاللي ووصاني
ولا سيفي ولا سهمي

ولا إلاك.....لسان وهمي
ولا حبي والهامي
ولا بصمة بابهامي
ولا فكري وأوهاومي
ولا أشواقي وغرامي
ولا مدادي ولا حبري
ولا الجنة لكن قبري!!!

مسجون

مسجون لأنك معتنق أفكار
مشبوه لأنك كتبت ع الحيطه
ارمي قميص الدم ع الثوار
وغطي راس فكرك ببورنيطه
واعمل خواجه بسذاجه وانتهى المشوار
وبلاش تكمل وفض دي الزيته
ما خلاص كشفنا اللغز والأسرار
وحمينا دولتنا بحجاب وتحويطه
لو من سلالته نبي وجدودك الأبرار
نقدر نلفقلك كذا ألف توريطه
تثبت ما تثبت لابد يوم تنهار
على إيد زناتي أبو رتبه وشريطه
والحكم جاهز تحت خط النار
إعدام لأنك كتبت ع الحيطه!!

حلم

على بوابات
من عام لعام
أحلم وايات
على باب كتاب
طب وأداب
والحلم عام
أمي اللي حلمت بالطيب
بيجس نبضها والديب
ويداوي ضلمه فى العقول
ويزيح بايده شئ مهيب
كان جهل واخذ شكل غول
أمي اللي صوتها من سنه
منحاش وضاع منه الغنا
قامت تدندن للوجع
تحكي لحمام القاعه حلم

وحمامنا للأحلام سجع
أبويأ نفسه وجدتي
حلموا بكتاب
صفحاته ألمي ووحدتي
وخطوط للنيل شطوط
والليل كأنه أخطبوط
كلبش كلامي
سن القلم بقا سيف
ينزع لجامي
وشعاع شق طوق الضلام وضاع
والحلم خام
بأني أدفي المظلومين
وأكوي بشاعة الظالمين
في كتاب ومن تألّفي
من طبع سيفي
ويا ناس بلدنا الطيبين
أنا هادعي وتقولّي آمين
دي مصر لساها جنين

والجنين محتاج لحضن
والحضن عقل مثقفين
نسيوا الخلاف....زاحوا الأئين
واتجمعوا قلب واحد....حضن واحد
مصر واحده..بكل واحد
على الوصول ناووين...على النجاح حالفين

اضغط أوي ع الوجع
وأنا مش هأقول آه..
م الغدر كيف اتوجع؟!
وأنا وكيلى الله..

واصبر لآخر الزمان.. يمكن يموت الغش!
ويبين وجوه الكذب.. .. يطلع للصدق وش
وان كان برغم الجمال لم يلتفت قلبي
فحبيبتي التي لا أحد حبا قبلها... لسه ماتولدتش!!

وأسفي ع اللى بيدعوا الخير.... وهما شر فى شر
وأسفي على اللى وجودهم كما الأصنام لا بتتفع ولا بتضر
وأسفي ع اللى عايشين كما الوسواس... لناس قلوبهم ماس....
وأسفي عليهم لو يظلموا فى الحر..ويقولوا سكر مر!

باسم الوطن والدينسيحوا دمي!
وسودوا لي سنين.....وكتروا همي
يا عم يا دباح...ولاجل ما تشبع سفاح
أمانه ع اللي جبوك . من قبل ما تدبح
ابقى افتكر سمي!

شفت قلبك... النهارده
يا حبيبتي فى المرايا..
مليان خبايا..
حزن وأسايا..
امسحي دموعك بروحي
وارسمي ضحكه شفائيك..
لون هوايا.....
وافرحي ..
عشان أحبك

فى بلدى ماشيه الناس
مليا هم المتاهات...
تضرب كتافهم فى بعض
تعملهم كدمات..
وزعنا توب الهم..
بالعدل ع المقاسات
يا أهل الكنوز الذهب
يا أهل الجحيم واللهب
يا اخوانا يا أهل السياسه
شويت حساسه!!
اتجمعوا فى ثبات
لا يجوز لمصر شتات
لا يجوز لمصر شتات

البطالة

بعد السنين الطوال
والصبر فوق الاحتمال
والسهر والتعب والخوف
والغش أحياناً!
ياخذ الشهادة الرجال
بعد الشهادة بلاده
والخيبة تبقى عاده
والعجز يسبق أوانه
والقهوة لابد ساده
أول طريق الشغل فى الجرنال
وظايف خالية للبيه وللشغال
كل البطالمة انتهت فى كام إعلان
اسأل مجرب وجرب هاتدرب
تكون نشال!!

مولانا الحب

مولانا الحب بيقولي
بانك بسمتى وضلي
والحب عارف إنك إنتى فينوس
وانك نفرتيتي
وانك مريت آمون
وانك عروس النيل
وانك لقلبى دليل
وأنا المتيم ورمشك دا اللى قاتلني
أقول أحبك وقلبك لسه ناكرني
طب أعمل إيه؟
وأنا اللى باغني لعيونك
وبادعى ربنا يصونك
يا أجمل بنت فى الكون
ولا كائن فى الجمال كأنك
ولا كائن فى الجمال يحلم إنه هيكونك

شفت الیلا دی عنیکي
بتوسع الشرايين
لحب داخل لقلبي
والحب أصله حنين
النبض زايد محبه
والقلب لسه جنين
والفكر فايض باسمك
مع إنه سردفين
قوليللى بالله عليكى
قوليللى لولا عنيكى
أنا كنت أحب مين؟!!

الحمد لله أنا مصري

الحمد لله أنا مصري
أباً عن جد
بنى جدي الهرم العالي
وأبوياسد
وفي حضن الجنه الخضرا
النيل امتد
يسقينا وكل اللي يجينا
من نبع الود
الحمد لله أنا مصري
أباً عن جد
علمت العالم يبني
يزرع- يكتب ويعد
مش غاييب يوم في الماضي
وهأعود في الغد
لا باحب الظلم لغيري

ولا أزعل حد
بس اللي يجيني آذيني
أفنيه باليد
ومكاني في الدنيا أمامي
حتماً ولا بد
والحمد لله أنا مصري أباً عن جد
قبطي أساسي
ومسلمه ناسي
وطني من ساسي لراسي
وما بينا يموت الضد
الحمد لله أنا مصري أباً عن جد

عنتره

عنتره

ياسيدي شداد
خوفتني م السيف
وبعد هد الحيل
ذلتني برغيف
ومن بقايا المهانه
ومن عيدان الليف
ومن بقايا الرجال
بالظلم والتزييف
مليت حشايا... ألم
بدم ويا نزييف
ولأجل قولت كريم
دبحتني للضيف
عماره يابن العم
وفرحته البكري

عبلة ملكة قلوب
لاملك ولا ملكي
جمالها من ربنا
وصيتها من فكري
عنتره وعبل
في العرب...
بيخلدوا ذكري
ياعبل سيفي ...
بعد السكوت.. تلم
وصوتي الزاعق...
بلا صدى
مانعني أتكلم
مهرك حياتي ياعبل
أفديكي ما أتالم
خوفي عليك زاد
وعنيا مشتاقه
عبد القبيله أنا
وحالب الناقه

أحلب ويشرب سيدي
من إيدي وييلم
والقاضي مش فاضي
في السيرك بيعلم
والعبد ممنوع
م الساده يتظلم
لكني أنا الجوع
بيقتل الشجعان
أعزل ومنزوع الضلوع
والأمان..
في غيبتي يا حبيبتى
بيكتروا الفرسان
والساده كالعادة
نسيوا إني أنا إنسان

النيل مرابه

النيل مرابه
والشمس نايمه على خده
يعكس الضي ونوره
في الغيطان ماده
ويطلع النور في القمح
تصفر العيدان....
ويعدي ضيه ع الدره
تبيض الكيزان....
وتغيب الشمس
يفضل سمار النيل...
موجود مع الإنسان
النيل مرابه
طل فيه
تلقى مصر
اللي راحت

واللي جايه
التاريخ حاكي فيه
مليون حكايه
صفحة واحدة
جايه أحمس
ويا مينا
جايه من أسوان
لسينا...
كل سطر
لو آسينا
كل نقطه
بتنادينا
لو نسينا
وش حابي الجميل
هانلاقيه لو نبص في المرآيه

حبيبي م البشر ماتت
لقتنى حبيت الحروف..
باكتب قصايدى وساكت
مؤمن وما ألعنش الظروف!!!

إلا رسول الله

مسكت السيف
قتلت الخوف
كتبت كلام عن الحلوف
زعيم الروم
من المعلوم
منيع الدين... يسب الزين
وأعمى القلب ما يعرف فين
علوم السيره وفقه الدين
دموع العين... تقولك مين
رسول الله
بمهجة قلبي أنا أكتب
حرف الميم
ولا أعتب على صاحبي
يكون الحاء
وأما الدال فلو تطلب

يكون ابني بقولت واء
ولا الأندال فى يوم تشطب
كلام الله

ليه قلبك الغدار ... رافع شعار «للجميع»؟!!
وكان لجبي طوفان..... فبنيتي سد منيع..
ياللي اتتي قلبك خريف...أنا قلبي لسه ربيع.
وان جف نبع الهوى.....فأنا مبتدا الينايع!!

يا مغيبين الوعي خاب السعي سعيكم
الرعي دا معروف بانه رعيكم
والشعب دا معروف بانه شعبكم
ففهموا الناس الحقيقه أحسن لكم !!

سيبتي ابتسامتك..ليه؟!؟
طب خدتي ايه معاكي؟
ولا غيرها أبكي عليه؟!؟!
ايه غيرها حلاكي؟!؟!

أبنا ماموتنا

أبنا ماموتنا
لسه حيطان البيت
بتعيد صدى صوتك
لسه الكلام والصيت
مش راضي بسكوتك
لسه الحياة والناس
مصدومتا من موتك
يا ابو ضحكتا كانت تجلجل
فى قلبي فاطمن

* * * * *

أنا شفت فىا عنيك
وشفت فىا ملامحك
لامحك وناس حواليك
بيحصدوا قمحك
علمتني ديني

فهمتني عيوبي
ورسمت لي ع الباب
القبله والمحراب
بمادنه أيوبي
وقلتلي صلي
وسقتني كاس الرضا
وقلتلي دا القضا
والرزق مش حيله
وأهي ماشيه بالتيله
ورضيت بمكتوبلي
لا وورثت منك ذهب
ولاجرام فضه
أصل الحياه بكثير....بقليل بتتقضا
ورثت منك قلب عمره ما صدا
وورثت منك أدب...محفوف بنار الغضب
وورثت منك لسان
وورثت منك إيمان
بيبان في حب الوطن

وورثت منك مفيش
إلا المحبه تعيش
وعرفت إنك مامتش
ميمتش إلا الجبان
وانت أبدأ ماكنتش
أبدأ أبدأ جبان
وأنا طفل شفتك بطل
بتحارب الشيطان
وخلعت تاج الظلم
وكسرت له الصولجان
وكبرت شفتك ولي بتحن ع الغلبان
وآمنت إنك مامتش
أبدأ أبدأ ما متش
فى القلب عاش الأب
هو الحنان ع العيال
والحب جوا الدرب
هو مآل الآمال
والرب بعد الرب

وباختصار...
أنا مش هاعيش تحت الحصار
ملعون أبوه الانكسار...
ومن الميلاد...
هاعيش أنا وأموت أنا
رافض لتعديل المسار

مين اللي قال الحب مات؟
يا حلوة ياسكر نبات ...
وحياة عيونك يا قمر
طلعوا الكواكب والقمر
ولا شافوا زيك فى البنات!!

يحرم علي الحب فى غيابك
ولا أدخل قصر الهوى إلا من بابك
انتى الحبيبه والحب بعدك عدم
والحب إيه يا حبيبه... إلا بك

كرباج ورا .. ياقلبي.. وودع الماضي!!
ظلمت ولا اتظلمت أهو ربك القاضي
واضحك ليومك..... ولوم اللي يلومك
واحلم ببكرة جميل وعيشها بتراضي

دائماً عروسه يا مصر ومزينه كنوزك.....
ليه تعطى عرشك وفرشك للى بيعوزك؟!
يا مضحكة الصورة..يا مفرحة المعازيم..
إذا كنا من أهلك..فإمتى هانحوزك?!!

عشقت كل الفواطم
وأحب كل الزيانب..
لا تقولي جوليا وساندي
فى عيون بنات الأجانب
لا يمكن أكتب قصايدي

الموت دا زي ال.....زي الإيه؟! زي الإيه..... مش عارف!!
لكنه فوق الرقاب...خلف الباب..جوا الحيا..ع المشارف!
سمعت قولك يا طيب وخذت الدوا.....طلع كلامك هوا
وأدينى جاني الموت وكله سكوت...لكنه سيل جارف!

ما بحبش

سألتنى بتحبني
قولتلها محبش
قالتلي أنا الحلوة
إزاي ما تحبش!
سكوتي هايزعك
كلامي بيخربش
وأنا اللي عايش ملك
والحب بيكلبش
فالفكر ليه يشغلك
إذا كنت مبحبش
قولتللي حلوة قلنا ماشي
بس تستهلي طناشي
مره شفت بنت زيك
قلت لايقه ع التماشي
ابتدى بيها وصالي

ابتديت ومنتهاشي
حي ليها وسهد بالي
عمري ما كنت مثالي
واللي زيك للتسالي

جاوبي يا حلوة سؤالي
حد حب ومبتلاشي؟!
حد حب ومنتهاشي!!

الـحـب زي الـإيـه ...

الـحـب زي المـوت
يـيـجـي فـى المـيعـاد مـظـبـوط
عـمـره مـايـتـأخـر
الـحـب زي الـنـدى
يـمـلـا الـحـيـاه و الـمـدى
و فـى ثـانـيـة يـتـبـخـر
الـحـب زي الـطـيـف
فـيـه الـحـقـيـقـه زـيـف
و اقـفـة بـتـمـخـطـر
الـحـب زي مـغـامـرة
و الـا مـقـامـرة
يـمـكـن أـخـطـر
الـحـب زي الـمـطـر
يـعـشـق زهـور الـشـجـر
و فـى الـخـريـف الـورق
يـدـبـل و يـتـبـعـتـر

تغازلني

تغازلني صبيا
في خيالي
تداعبني وتتمنى
وصالي
وفي الأحلام بنات حوا
حلالي
ولا أخلاق ولا مفتي
يغالي
بنات ألوان بتتمعشق
بحالي
حلاوة الروح وخفتها
جمالي
وأنا اللي أحبه أنحني له
بتعالي
ولا تكفي شباب أمه

بدالي
وشفت كتير ولا غيره
صفالي
أبوس الروح إذا قلبه
صبالي
عشقت قلبه اللى عشقني
وسعالي
وطاف خياله فلاحه
أمالي!

أعيشها إزاي؟

حد يقولي أعيشها إزاي
دنيا دنيئه وعامله بريئه
ترقص للي معاه الناي
شابه جريئه بألف طريقه
خطفت مني عمري الجاي
هي البحر وعامله غريقه
جايه عليا وهي معاي
قلت دي ميه لقيتها حريقه
حرقت قلبي رايح جاي
واسعه لكنها واقعه في ضيقه
خاطفه لصوتي وكاتمه غنائي
حلوة يا دنيا وليا مسيئه
بس أنا طبعي مش شكاي
ريك هادي... و حكمه مشيئه
يهدني البسمه للبكاي

دنیا دنیئه وعامله بریئه
لما غلبت أعیسها إزای
قلت یارب أجاب لی دعای
شفت الفرحة صباحی مسای

الإيد فى الإيد

الإيد فى الإيد والقلب حديد
وتاريخنا يا بلدي قديم وجديد
مليان أمجاد.
من قبل الدنيا ما تعرف عيش
كان عندنا جيش
وفتحنا بلاد
وفي عصر النوم...
كان لينا علوم
ولا حد يلوم علي شعب يقوم
زي المعتاد
جانا الهكسوس ويجينا تثار
كل اللي يدوس نرنيه فى النار
مهزوم بييمعاد
مغلوبه الفرس
مغلوبه الروم

علي إيد أجداد
وباسم الدين... يحكمنا ولاه
ولا قال الدين... طيعوا الجلاد
دا الدين ما أحلاه
الدين لولاه....
هانضيع يا اولاد
يحكم ممالك
يحكم سلطان
محروم م السلطه ابن الأوطان
مع إن الكل عباد!!

يا أم العيون العنكبوت

يا أم العيون العنكبوت
الحب عندك بنكنوت
م السهل تزويره
المال مبيعليش بيوت
حطي وعودك جنب قبلك
ع الشمال
وخلي أحلامه الجمال
تتساوى بالزيرو
الحب عندي جنيه ذهب
وجنيه ماس...
الحب ما يجيش التماس
الحب قلب لقلب
وناس لناس
وعيون بتسأل...
وعيون تجاوب ع السؤال

أنفاس بتحضن بعضها بحماس
هزالهوى حلمنا
عوى جنبنا الحراس
غنت معنا الشقايف
ودقت الأجراس
حلال يا حلم الحبايب
وبدون ما نأتي المعاييب
حواس تجاوب حواس

جماهير بنت كلمة

جماهير بنت كلمة
وناس ولاد إشاعه
وودانهم مسالمة
للي تقوله الإذاعه
ينجذبوا لأي لمه...
وفي أي يوم وساعه
ويكل حماس وهمه
وبطاعه وبوداعه
يملوا ميادين مهمه
طلبه وصُناع وباعه
قسيس وشيخ بعمه
اندمجوا وعن قناعه
خطبوا في الناس بدمه
عن وحدة الجماعه
وتزيد الخيبه لما

اتقسمنا فى براعه
فى الماضى كنا أمه
بنعلم الزراعه
دلوقتى إحنا الأئمه
فى الجهل والمجاعه

الناس دي لسه بتبتسم

الناس دي لسه بتبتسم

الناس دي إيه؟

الناس دي صلبة كالحديد

مع كل حزن جديد مولود أمل

وأملها طفل وليم

متحملت لو إيه؟

كان محتمل

متحملت بإفيه

أفيونها هو العمل

الشهد ساييل في الوريد

والضحك واضح مكتمل

الناس دي صابرة ع الشدايد

وفي صبرها زي الجمل

يشهد لها صديق محايد

عدو لدود

يا شعوب بتسأل مين يسود
المصري... عايد
المصري سايد
المصري لسه يبيتسم
فى وش كحل الليل
وفى وش غصن يميل
وفى وش طفل جميل
وفى وش ضيف أو سيف وبندقيه
المصري لسه يبيتسم
يا بهيتا
الضحك اصله وصيتا
والابتسام زي الكتابة والهندسة والطب
زي الحب
كما كل شئ فن وعلام
المصري علم الإنسانية الابتسام

عيدي تاني ضحكتك

عيدي تاني ضحكتك
قولي تاني كلمتك
ماتعدهاش
إحنا اللي بايدينا الأمل
واحنا اللي بايدينا الدوا
فازاي نلوم طبع الهوى
لو يوم مجاش
أه لو رمش العين جنابه
العيون تفتح لي بابيه
قلبي يتهنى بشبابه
ولا ينسهاش
عيدي تاني خطو قدك
فاض هوايا بفضل مدك
شطي كان يتمنى ودك
قام جمالك زاد وغطى
وما انتهاش...

قلنا مش هانحب تاني

قلنا مش هانحب تاني
وكنا إمتى محبناش
وحلفنا بالسبع المثاني
وقلنا هنمشي يا واش يا واش
شفنا كل الحب فاني
قلنا ليه على إيه بلاش
فجأة والحب فى ثواني
بييجي أسرع م الفلاش
قلت الحب مزيه
واحنامش ناقصين أذيتا
مين لقلبه يجيب بليت
فيه حاجات ليها أولويه
وفيه حاجات متخصصناش
كنا لسحر العين يوماتي
نمنع القلب يطاطي

قلبنا مش للتعاطي
خلي قلبك انبساطي
وامنعه من الإنكماش
قلبي قال والحب لأمه
وكمل الحب كلامه
وابتدا الحب بسلامه
وابتدا ومنتهاش

العسكري المصري

الله عليك يا العسكري المصري.....
لايق يا باشا فى زيك العسكري
الناس عينيهـا ... تحب تنظر لك
وفى ساعة الملحمة ..
إنت اللى حامى الحما
أرضاً وبحر وسما....
الله ينور لك طريق النصر
دي حبة الرملة لليياده تبوس
وتقولها مش عايـزه غيرـه يدوس

* * * * *

الأرض عشقت وقفتك فى الحق
سمعت صراخك ... لا للهزيمة.. لأ
أهو خاف عدوك واتهز واتلأ
قالوا اللى أبوه مصري....
لا يخاف ولا يقلق ...

اللّٰه عليك يا العسكري المصري

* * * * *

إنت اللي سيد والأعادي عبيد
وقف سلاحك.....لو بالبيادة تبيد.....
دا كل شئ للخردع وسيف
وانت اللي فى أكتوبر صنعت يوم العيد
واقف وحالف تجدد المواعيد
اللي عليك يا العسكري المصري

* * * * *

إنت اللي قائد وانت اللي بتنفذ
تمام يا فندم جاهز ومتقفز
وفى ساعة الشدة شجاع ومتحفز
اضرب جنابك والموت يطيع الأمر
اللّٰه معاك والنصر يتمناك
ارفع رايتنا يا أخويا ما أحلاك
دا إنت اللي بتهمني يا العسكري المصري

تحت التوتربدأت أسطر كتاب
وقلبي رق...ألفت في الحب باب
هوأتي أكتب والفن رأسمالي
أنا لا أبالي إلا بالأحباب...

عالين على اللى علا
تعشق خطانا أبواب
ومر يومنا حلا
ما دام معانا أحباب
قل للمواقع هلا
ماداد معانا كتاب

آه لما يبقى الأمان فى الهروب
وان الملاذ هو انتهاز الدروب
وتتنفى وتختفى زي الشعاع
ضاع الدفا فأكتفى بوقت الغروب!!

جربت تحب الأرض

جربت تحب الأرض
تحضن شجرة
أو صخرة أو قل
تغمز بعينيك لعيدان الفل
بتخاف لا يقولوا عليك دا مختل
إفرد درعاتك والمس
خد الميه بخدك
خلى الموجة تحس بودك
قرب م الرملتة واحفر فيها
تابوت على إيدك
اتنفس وكأنك جوا
حضن البنت اللى ضاعت منك
لو شفت الورده الحلوة ما تقطفهاش
قرب منها ومد لها أيديك
وانحني فى وقار

الأب اللي بيتأمل بنته المولوده
فى نص الليل
وزي ما نفسه ياخذها فى حضنه
عايزها ما تصحاش
وكانك فجأة قابلت أميرة
الأرض جديرة بأنك وانت بتمشي
تخلي الخطو غناوي
تضبط بيها إيقاع السعي
تكتب نعي فى ورقة توت
سقطت من همها فى الغيط
كانت حلم لدودة القز
تصنع منها شلّة خيط
جرب إن النيل
يشكيلك عدم الوعي
وإن الأفضل لأجل يدوم
ويعوم فى الوادي العز
تسقي غيطانك بالتنقيط
جرب إن يقولوا عليك دا عبيط

علشان بتقابل
شجر الشارع بالأحضان
لو كان الحب جنان
أو أيًا كان الوصف
يكفي بأن الأرض حبيبتي تحس أمان
إنها أم الإنسان!!

سلام على قبر أمي

أول ما عيني أبصرت
نور ربها
أول ما قدمي اتعشرت
في مشيها
أول ما نبتت كلمتي في اللسان... والشفاه
واستفسرت عن الإله والحياه
أنا قلت يا أماه
ما تحفظيني الفاتحة والزلزلة
مليت يا أمي اللعب والمعيلة
ما تعلميني الفعل والفعلة
وأنا طفل شايف أمتنا ليه مهلهلة
ما تكلميني يا أمي عن أبويا والمرجلة
قالتلى سمع قد سمع والمك
وأأمل بعد الصلا في الفلك
وشوف ربنا ليه خلق الحياه والخلق

علشان يشوف مين فينا أحسن عملا
مين اللي فينا بيحتمي بالصبر
ولما أموت أكتب على شاهدي
بالقلم والحبر ...
اللي تحس بيقوله قلب يتيم
أمه ماتت ... وكان نفسه يكلمها
أقول فيا كلمة تعيش تقوي قلب اليتامي
قول كلمه للعلم .. والحلم والسلامه
هاظمن أنا الأموات على ولادهم
وظمن انت ولادهم وامسح على راسهم
وخلي دا بينا علامه ..
واديني يا أمه ع الوعد كل ما أشوف قبرك باقول:
سلام عليك يا قبر أمي
وسلام عليك يا أرض ياللي بتضمي
الأم اللى وهبت عمرها بإمتنان
وغنت فى وش الموت نشيد الحمد
غننته عن عمد
وكان كان في عنيتها سدره المنتهى

والجنة خضرا مزهزتها
تتعجب الأقدار من فعل هذي الأم
حتى الوجع حبها فسقاها كاس الهم
الكاس مساحه يم
تشرب ولا تهتم
وصتنا لا نغتم
يا حزن إنت أصم
ولا انت مش زيبها
سلام عليك يا حزنها المكتوم
بكرا القيامة تقوم
يا أمه ونتلاقي
عيون ولادك يا أمي مشتاقه
لحضنك الطيب
من يوم ما غيب
ولا حضن ساع الحزن اللي جواهم
نخاف نقوم الصبح منلاقيش
بتوصي شمس الصبح تضحكلنا
وتزغزغي في قلبنا

يا أمه وتدعي لنا
فنمشي بين الوشوش
فميسألوش
عن اسمنا
القلب الأبيض قالهم
إن اتقي أمنا
سلام عليكى ياروحها المؤمنه
وعند ربك انتي مطمئنته
الدنيا عند الناس هنا محزنته
أذيه بالأفعال وبالأسنه
يا قبرها الفرحان
وقلبي حزين
ليه تفرح بضمته وساييني كلي أنين
إمتى هنتلاقى فى شوق وحنين
يا اما نفسي أكون جواك
يا اللى انتى بتضمها.

كل شئ في العين ممل
نص كامل أو مخل
جوا شمس حياتنا ضل
النسيم هواه يعل
في القلوب البيضاء غل
العلا في علاه يعل
العزیز فینا یذل
واللي فاهم ليه يضل
كل شئ أصبح ييشل !!

يارب يا خالق العباد
ورازق الخلق البعاد
جمعني بحبيب
قال جاي ولا عاد
جمعنا من غير ميعاد

حادي بادي

حادي بادي وبادي حادي
ونفسي يا شعب تكون البادي
إعرف نفسك... أنت الرئيس
عز بلادي
إنت قانونها... واللي يصونها
إنت العسكرع اللي يخونها
ولما نعادي
إوعي تصدق... حد يقولك
أنا اكون عمك
إنت كبيرهم... يعني مسيرهم
يرضوا بحكمك
وتكون سيدهم
إوعي تطبطب... إوعي تدادي
إنت الأقرب.. وإنت الأصوب
إنت الهادي.... وإنت القادر

ع المتماذي
واياك تسمع كلمة لحزب
دا كلام كذب
إسمع نفسك
صوتك عذب
نيلك عذب
ياابن الوادي
واياك قسمة
مصر الواحدة
أجمل رسمت
تشوفها ولادي
إنت النيل
والنيل عمره مايقبل قسمه ولا كان حزبي
بس موحد ربه حياذي
خليك زيه مصري وبس
وغني بلادي بلادي

يا مكن داير وحاير
بين غيطان الفلاحين
لما بتهل البشائر
نبتدي والله معين
نحصد الزرع اللي فاير
بالمحبة والحنين
نعزم الطير اللي طاير
شالله يا كل فدائين
هات ياسيدي الكيل وعاير
ياما بينا مساكين
بيتك العامر عماير
لما تعطي الغلابين
يامكن انت السواقي
وانت أحجار الطحين
وانت فلاحنا اللي باقي
لو يغيبوا الفلاحين!

العقرب اللي بيلدغك
مش عشان جلدك طري.. ولا انت ظالم مفتري
دا هو مجلوب ع الخيانه.....
ولما شاف طبعك ندي ريقه جري!

والناس الناس وما أدراك
عاشين في عراق
فلو أنت ملاك
هايسبوا الديبه وراك
تاكل في عشاك
وانت لو عالم في الافلاك
هايقولوا حمار..!!
لو تفتح روما وضواحيها
وتقوم وتصوم الدهر
هايقولوا عليك من اهل النار

الفهرس

- ٥..... تقديم -
- ٧..... أنا ابن موت -
- ١٠..... تشجع -
- ١٤..... وأقول يارب -
- ١٦..... يا اللى رفضت الورد -
- ١٩..... حبيبتى -
- ٢٠..... فى رثاء (طلاب الأتوبيس المحترق) -
- ٢٢..... الضحك فن -
- ٢٣..... القصيده -
- ٣٠..... غزل البنات -
- ٣٢..... التوبة -
- ٣٥..... وفيه يوقلك -
- ٣٧..... رمضان كريم -
- ٤٠..... من إيه -
- ٤٣..... صوت الشهيد -

- ٤٥ يا ظلم سيبنى -
٥١..... الحب -
٥٢..... العيش -
٥٥ يا أم الرموش -
٥٩..... وراودتنى الدنيا -
٦١..... أنا شاعر -
٦٣..... ست الحسن -
٦٥ لا -
٦٧..... مسجون -
٦٨ حلم -
٧٧..... البطالة -
٧٨..... مولانا الحب -
٨٠..... الحمد لله أنا مصرى -
٨٢..... عنتره -
٨٥..... النيل مرابه -
٨٨..... إلا رسول الله -
٩٣ أبداً ما موتش -
١٠٣ ما بحبش -

- ١٠٥..... الحب زى اليايه -
١٠٦..... تغازلنى -
١٠٨..... أعيشها إزاي؟ -
١١٠..... الإيد فى الإيد -
١١٢..... يا أم العيون العنكبوت -
١١٤..... جماهير بنت كلمة -
١١٦..... الناس دى لسه بتبتسم -
١١٨..... عيدى تانى ضحكك -
١١٩..... قلنا مش هانجب تانى -
١٢١..... العسكرى المصرى -
١٢٦..... جربت تحب الأرض -
١٢٩..... سلام على قبر أمى -
١٣٥..... حادى بادى -